

祈雨請經一徧隨獲霽然又昔霖潦別駕復
令祈晴立霽又一夜請此經見屋內光明若
晝有王者數人與諸仙東長跪合掌禮拜稱
善文展大驚下座回禮云文展無道法得聖
賢如此恭敬罪當萬死王者云我等皆天人
魔玉適向諸天見此人間有光照燭故尋光
化身下降云珍重而去出金蓮

○ 卷六

十九

三經同卷

高上玉皇本行經髓

高上玉皇心印經

高上玉皇胎息經

高上玉皇本行經髓

道言昔

元始天尊在清微天中玉京金闕七寶玄苑

玉皇宮殿陞光明座與無鞅數眾宣說靈寶

清靜真一不二法門是時

玉皇尊帝與諸真聖清齋建節侍在側焉於

是

玉帝知時欲至即於會前舉六通力放大光

明徧照諸天一切境界皆大震動十方無極

俱同瑠璃下燭下方是諸世界一切人天咸

鑠道氣當是之時都鐵圍即時破壞三惡

道苦一時解脫爾時

玉帝即分其身徧散十方諸大天宮自然化

現白玉為京黃金為闕七寶玄苑大光明殿

具光明座幢節幡蓋異寶奇花徧布是處

五七

爾時

玉帝即以所分其身徧於是處普為十方演

說清淨解脫之道說已即以神通不動其所

移接天人皆令得至清微天中玉清聖境元

始會下是諸眾等不覺不知普來集會時諸

大眾稽首瞻仰

玉帝化身忽覩天尊勝會踴躍歡喜一時作

禮歎未曾有

爾時高虛清明天主與諸天尊屬御八景鸞

與九光寶蓋奏玄歌妙樂詠無量洞章散天

寶花噴天真香飛步遊空來詣道前稽首長

跪白天尊言賤臣懈怠後會法筵今日吉慶

建此法橋幽顯凡聖普霑聖澤放大光明現

希有相臣等千劫良因九天運會今日大吉

咸仰玄功以偈讚

上帝曰

金闕玄宮主 高上玉皇尊 妙相冠諸天

慈光燭三界 真聖妙道師 天人依仗師

大乘垂法語 真一指迷途 功德若虛空

讚揚無窮盡

爾時

天尊告四衆云是帝身即道身也非常體也汝等親近是帝生尊重心注想尊容稱揚名號然後汝等咸蒙護度

爾時天地始祖五老上帝稽首長跪白

天尊言伏聞高上玉皇慈念蒼生普放神光照燭法界六凡四聖普叨道蔭切以自昔

元始天地未分日月未光是生

玉帝故得二儀分判三景發光恭聞帝號稱說難言真可尊詳巨即命鑄金為簡刻玉為

章寔靈文之妙德乃天地之玄根惟願哀憫使依玄科按法以傳於是

天尊普告真聖云今三天盤運皇道氣暢真道宜行乃命五老上帝與諸真聖上詣太玄

玉都寒靈丹殿紫微上官洞陽玉館披九光

八色之縹雲錦之囊出靈寶金書玉篆文曰

太上彌羅無上天妙有玄真境渺渺紫金闕

太微玉清宮無極無上聖廓落法光明寂寂

浩無宗玄統總十方湛寂真常道恬漠大神

道

玉皇大天尊玄穹高上帝

是時五老上帝得是經已還詣

元始天尊前諮以禁戒之儀進謝不逮

道言是帝號也

元始之妙言玉皇之真語至真妙文神應自

然乃知天眞貴重至聖上書斯文隱秘不得

窺聞有得之者勤行修奉尅至神仙於是五

虛上帝白

天尊言願為四衆及未來世持是經人說利

益事爾時

天尊告玉虛上帝言若有三界十方無量國

土或兵戈並起疫氣大行水旱蟲蝗凶年飢

饉是其國君當發慈悲為其黎庶禱請道流

清淨嚴潔為轉此經當得國土清平五穀豐

熟黎庶安泰此經所在之處常有十方至真

侍衛供養持是經人獲福無量又若持是經

人造作長壽書

帝名號於其牆上被諸風吹所指方面一切

衆生皆獲勝利又若持是經人書

帝名號在一切有聲物上或是道場或以戲

擊或被風觸是聲出時一切衆生聞是聲已

所有罪障悉得清靜何況受持當知是人即

是道藏功德身也

爾時

天尊謂玉虛上帝言今我略說未盡其妙若

廣說之凡流邪見疑惑不信是經功德窮劫

難言

爾時玉虛上帝聞說是已心生歡喜瞻仰慈

顏稽首讚歎而作頌曰

九天之上謂之大羅玉京金闕雲層我我
中有天帝仁慈恩和至道無敵降伏衆魔
天寶靈符玉律金科神仙億萬懽騰衆多
聞者罪滅永出愛河
是時玉虛上帝說是頌已足諸天衆異口同
音歎未曾有於是
天尊告四衆云凡人持誦此經稱揚帝號者
皆道根深重宿有善緣此經專妙普度無窮
但精心恭奉家國安寧保命度災掃諸不祥
能碎鐵圍山竭苦海水破大地獄拔重罪苦

降暴惡魔護諸國土能除一切重病能解一切惡毒能離一切惡人能滅一切惡獸能推一切邪道一切諸天皆令降伏其餘功德說不可盡爾時四眾聞說是已歡喜踊躍稽首敬禮而退

高上玉皇本行經髓

傳經源流

南嶽總仙上真司命紫虛清真元君二十四代嫡孫安成玉源仙派上清三洞五雷經籙階微明元使劉處源元至正四年七月內自廣西柳州路雲遊至海北八月十五日晚至化州路石城縣地面一郵亭聞無人煙至夜半風清月白展轉不寐遂行望月不覺至路傍見石上坐一老翁龐眉皓首跌坐處源至前謁而問曰此去化州路程幾許翁曰半日可到方今盜賊橫行州郡殺擄官民生靈橫天際可哀憫行止宜乎謹慎處源謝曰多蒙訓益然生死由命不容易耳汝何年庚處源告其生年月日翁視諸掌曰汝命數當有瘴瘧劫賊刀兵水溺之難幸子有濟人之功亦不免此一難處源再三告曰願示祈禳之法翁曰但至誠誦本行經髓雖見難不傷大命處源曰予入道三十年未遇經髓惟本行經亦常持誦恐難遇經寶有辜禳解之方翁曰幸我佩帶斯經在此吾已心識經句就

當以經本授汝遂於懷中出一黃素囊取經授曰可專心持誦廣傳世人誦誦獲福無量吾乃毗陵道士也汝記吾名言記起身而行路傍三步冉冉乘雲而去處源再拜于地恍惚不見處源徘徊於石瞻望不覺天曙見石上有坐跡及昇天脚跡儼然十六日午至化州在城石龍縣攀龍坊龍母山下陳宗武家安下間有廉州知事黃一龍字雲從乃吳川人也維時權石龍縣事會中詢其昔宿郵亭之名曰仙界舖也處源曰因何而名仙界雲從曰古有一仙坐郵亭之側路傍石上坐跡足跡印證人世此仙或隱或降人間罕逢處源悟于心曰豈非神仙之再示傳是經乎二十五日身患瘴熱大重連日徯賊行劫聲息不絕處源憂慮交集九月初一日子時分瘴熱昏瀉恍惚見一金甲天神喝曰賊已至急避之手覺精神稍爽身熱清涼遂盟天誦經訖倚枕就牀而坐天色已曙忽聞風雨驟至之聲于驚呼同宿者江德問曰賊至

虞源佩經出戶城內外男女紛然奔走予亦奔至江岸見男女交雜上船予讓之先舟中化州知事張思立呼曰先生賊追至矣可急下水來予回顧賊至止隔二丈許鎗弩並施予乃投水而身自浮流一里許江心得舟人吳日明手援上舟解衣盡濕而經冊不濕虞源拜謝天地水曰荷再造之深恩予生不能浮水豈非本行經力神靈默佑使虞源入水不溺遇劫賊刀兵而不傷噫仙真之報不妄命分難危苟免乃知本行經力不可思議虞源不敢淪沒遂告盟天地鍍梓印行十方以廣其傳使有緣者咸臻道炁共證玄功者

高上玉皇心印經

上藥三品神與氣精恍恍惚惚杳杳冥冥存無守有頃刻而成迴風混合百日功靈默朝上帝一紀飛昇知者易悟昧者難行履踐天光呼吸肅清出玄入牝若亡若存綿綿不絕固蒂深根人各有精精合其神神合其氣氣合其真不得其真皆是強名神能入石神能飛形入水不溺入火不焚神依形生精依氣盈不凋不殘松柏青青三品一理妙不可聽其聚則有其散則零七竅相通竅竅光明聖日聖月照耀金庭一得永得自然身輕太和充溢骨散寒瓊得丹則靈不得則傾丹在身中非白非青誦之萬遍妙理自明

高上玉皇心印經

高上玉皇胎息經

玉皇天尊曰胎從伏氣中結氣從有胎中息氣入身來謂之生神去離形謂之死知神氣可以長生故守虛無以養神氣神行即氣行神住即氣住若欲長生神氣相注心不動念無來無去不出不入自然常在動而行之是真道路

高上玉皇胎息經